

Noticia
Transparente
di Gobierno

ISLA ONLINE

Diaranson 10 Juli 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



UN TOTAL DI 212 ALUMNO DI EPB SANICOLAS A COMPLETA NAN ESTUDIO EXITOSAMENTE

"Aruba mester di futuro profesionalnan y mirando e cantidad di graduadonan ta yena mi di speransa pa un miho futuro"

Diamars anochi na Renaissance Convention Center a tuma luga e ceremonia di graduacion di EPB Sanicolas, na unda un total di 212 alumno a gradua, pa un porcentahe di 93% di e scol. E grupo aki ta e prome graduadonan di e Arubaanse Beroeps Opleiding (ABO) MBO nievau 2, cu ta consisti di 3 sector, Unidad Servicio, Unidad Technico y Unidad Economia.

Unidad Servicio ta conta cu un total di 74 graduado, cu a completa nan estudio exitosamente pa bira un "host" profesional. Unidad Technico ta duna e alumnonan e oportunidad di siña tur loke ta encera "ICT Support", y tambe ta conta cu un total di 74 graduado. Por ultimo Unidad Economia cu e enfoke riba "Assistant Business Services" tin un total di 64 graduado.

Prome Minister Evelyn Wever-Croes tabata presente na e ceremonia aki, y tabata tin e oportunidad di duna un discurso, na unda el a dirigi su mes na e graduadonan cu un bunita mensahe. El a expresa; cu atendiendo e ceremonianan di graduacion di varios scol, ta yen'e cu emocion, recordando asina tempo su mesun yiu na a gradua, mirando cu ta momentonan importante pa e alumno cu a gradua y pa e mayornan. P'esey pa su persona ta un honor di por ta presente na e ceremonianan aki, na unda e por comparti e bunita momento aki cu cada un di nan.

"Mi ta felicita tur e graduadonan cu e logro grandi aki. Awor boso ta bay drenta den un etapa nobo, na unda boso futuro ta depende di boso mes. Tambe mi ta gradici tur docente cu den tempo bon y malo semper a sa di pone bienestar di nan alumnonan na prome luga. Por ultimo mi ta gradici e mayornan pa a kere den nan yiu, y pa a duna nan e sosten necesario pa nan por a completa nan estudio exitosamente. Nan logro ta boso logro tambe. Aruba mester di futuro profesionalnan, y mirando e cantidad di graduadonan ta yena mi di speransa pa un miho futuro", Prome Minister a expresa.





CAS MARIE TA HABRI NAN SEGUNDO

LOCALIDAD: MAMA TIES

E prome logro di proyecto Pasadia

Minister Arends ta orguyoso pa extende felicitacion na henter e ekipo di Cas Marie pa nan trabou pa logra habri nan di dos localidad, Mama Ties. E energia, dedicacion, y amor cu nan a bin ta demostra pa nos adultonan mayor ta algo cu nos tur por ta orguyoso di dje.

Na September aña pasa, directiva di Cas Marie a presenta nan plan di expansion pa 2024. Un plan cu ta alinea cu e vision cu Ministerio tin pa nos adultonan mayor. E realidad ta cu e cantidad di hende cu demencia ta creciendo rapidamente aki na Aruba, pues no tabata tin duda cu mester a amplia capacidad pa por cumpli cu e demanda creciente.

Den menos cu un aña, e apertura a tuma luga den curason di Santa Cruz, celebrando hunto cu Famia Croes y Cas Marie, e logro significativo aki. Cas Marie ta un partner importante den e Proyecto di Pasadia, un proyecto principalmente pa adultonan mayor cu ta core riesgo di keda socialmente isola. Cu e apertura di Mama Ties, nos por orguyosamente bisa cu menos adulto mayor lo core e riesgo ey.

"Mi ta sigur cu awe ta un momento sumamente emocional pa Famia Croes, pa Cas Marie pero pa nos Ministerio tambe. Un logro cu tabata rekeri colaboracion di hopi man y curason nan. Curason pa crea un ambiente unda cada adulto mayor por sinti nan mes balora y aprecia," Minister Arends a expresa durante su discurso.

E apertura di Cas Marie na Mama Ties ta un bunita proyecto cu sigur tin un significacion grandi pa henter famia Croes, kendenan a pone e hogar di nan mayornan disponibel pa sirbi un meta hopi importante pa nos pais.

Palabra di pabien na Cas Marie pa e gran paso aki cu ta un testimonio di un futuro yena cu posibilidad y oportunidadnan positivo pa e bienestar di nos adultonan mayor. Minister Arends a conclui reafirmando su confiansa, cu basa riba e dedicacion cu nos a bin ta mira pa cas di Mama Ties, Aruba lo logra hopi mas pa nos adultonan mayor.







COLECCION ARUBA TA HAYA ATENCION INTERNACIONAL

Recientemente Aruba su Plataforma Coleccion Aruba tabata den noticia internacional. E mandatario ta informa cu Sra. Ali Rogin, un reportera y correspondensal di PBS News a traha un segmento den noticia tocante con e cambio di clima ta afectando e paisnan chikito cu ta mas vulnerabel.


Pa e ocasion aki ela concentra riba Tuvalu, un nacion insular consistiendo di shete isla den Pacifico cu ta disparciendo poco poco. Alabes sra. Rogin a duna atencion na e portal digital Coleccion Aruba enfatisando e importancia pa preserva archivonan, documentonan, grabacionnan cu ta herencianan cultural cu ta vulnerabel pa e efectonan di cambio di clima. Coleccion.aw ta e archivo digital mas grandi na Papiamentu y ta brinda acceso liber na archivo digital di documento, potret, video y grabacionnan di Aruba.

Efectonan di cambio di clima

Pa e parti di Tuvalu, e reportera a entrevista un Minister di Asuntonan di Exterior, sr. Simon Kofe y un representante di Nacionnan Uni di Tuvalu, sr. Tapugao Falefou cu a splica e retonan cu e pais chikito aki ta encontra door di e cambionan di clima. Sra. Rogin ta splica cu e cambio den clima, no solamente por haci daño na infraestructura pero tambe e ta forma un peliger pa archivonan, documentonan y otro artifactonan, ya cu esakinan por wordo destrui y asina por perde un parti importante di historia general y historia cultural di un pais.

Importancia di digitalisacion di documento

Durante e grabacion di algo mas cu seis minuut, e reportera a entrevista sra. Kate Knibbs cu a skirbi un articulo tocante e colaboracion entre Coleccion Aruba y Internet Archive, cu ta e Plataforma digital cu ta 'host' Coleccion Aruba. sra. Knibbs a elabora riba e importancia di digitalisacion di documentonan.



Coleccion Aruba

Pa e parti di Coleccion Aruba, e reportera di PBS News a entrevista Sr. Peter Scholing, investigado na Biblioteca Nacional Aruba y e iniciado di Coleccion Aruba y tambe e historiado y autor dr. Adi Martis.

Sr. Scholing ta splica dicon ta importante pa preserva herencia cultural digitalmente, especialmente awor cu e cambio di clima cu e temperatura ta subi. dr. Martis ta brinda informacion tocante con eficiente Coleccion Aruba ta pa e como investigado, na momento cu e tabata investiga por ehempel tocante e esclavitud na Aruba.

PBS

PBS ta un canal publico na Merca y PBS News ta wordo transmiti via Youtube y e canal tin mas cu 4 miyon suscrito y e grabacion a ricibi mas cu 15.000 like. Por mira e noticia aki riba <https://www.youtube.com/watch?v=3cSL2xFNOLU>

Gradicimento

Minister di Cultura ta gradici e sra. Rogin di PBS, pa e interesante segmento di noticia aki. Alabes ta yama un danki na sr. Peter Scholing y dr. Adi Martis pa nan cooperacion pa brinda informacion tocante coleccion.aw y tambe pa promove nos Pais Aruba. ■■■

MINISTER MADURO DI FINANSA TA LAMENTA CU PARLAMENTARIO MARISOL TROMP NO POR CONTROLA SU RABIA

**Enves di mira den cura di otro, bay controla e fiestanan den bo
cura di cas na Malmok**



E ta masha notable cu ultimo tempo Parlamentario Marisol Tromp no por contene su rabia riba e hecho cu e maneho serio di Minister Maduro di Finansa pa atende cu finansa publico di nos Pais ta dunando su fruta. Un hecho cu ta wordo conclui den varios raport di expertonan financiero di Banco Central, CAFT, IMF, EBA etc etc. E hecho cu poco tempo atras hasta e Executive Director di IMF a bin te Aruba pa informa con contento nan ta cu e recuperacion di Aruba y e contenido positivo di e ultimo raport di CAFT riba e cifranan di aña 2023, parce tambe tin Parlamentario Marisol Tromp basta rabia, ya cu constantemente e ta busca algo pa critica e mandatario di finansa cune.

Tur pregunta a haya contesta

E Parlamentario a haci pregunta por escrito y den reunion

publico, y Minister Maduro a contesta tur pregunta den placa chikito pa e Parlamentario por compronde, ya cu Marisol tin casi 30 aña den politica, pero lamentablemente ainda no ta domina finansa publico.

Baha rabia riba cacho

Sinembargo e Parlamentario no a keda contento cu e contestanan y a baha su rabia ta traha yen di video, tik tok, etc pa haci chercha y baha su gal riba e mandatario. Ultimo aki Marisol a recurri pa bay baha su nervio riba e cachonan y un par di puppies di Minister Maduro, bisando cu e mandatario no lo por handle ni su cachonan na cas, corda finansa publico.

Rabia ta domina Marisol atrobe
Aki atrobe Marisol ta bolbe demostra cu e no por domina su rabia y cu e ta NUL KOMMA NUL na contenido pa hiba un debate basa riba informacion financiero. Awo Marisol kier hala atencion negativo door di baha su beis riba cachonan di

e mandatario. Ta e mesun rabia aki ta locual a hiba Marisol haci ful un spektakel den Parlamento y riba dje gaña cu e Vice Presidente Dammers lo a dal e na su cara. E ta un berguensa cu un politico versa manera Marisol, no por controla su rabia y pesey mester sinta gaña pa hala atencion.

Bay controla fiestanan den bo cura

Minister Maduro ta di opinion cu enves cu Marisol sinta mira e cachonan den cura di e mandatario su cas, e bay controla e fiestanan den su mesun cura. Ta eyan e berguensa ta sinta ora bo mira videonan ta circula di fiesta di tiener na Malmok yena cu alcohol y unda tur cos por. Esey ta un berguensa cu Marisol mester bay atende den su propio cura, enves di baha su rabia riba algun cacho na otro cas.



MINISTER

Geoffrey Weaver

TUR CUENTANAN ANUAL DI FREEZONE ARUBA N.V. ENTREGA Y APROBA



Diaranson 10 juli 2024 - Minister di Asuntonan Economico, Comunicacion y Desaroyo Sostenibel, mr. Geoffrey Weaver, hunto cu director di FreeZone Aruba N.V. drs. Greg Peterson y Presidente di Raad van Commissarissen sr. Patrick Brown, a aproba e jaarrekening di añanan 2020-2023 den un shareholder's meeting.

FreeZone Aruba N.V. ta un compania estatal cu pais Aruba como e unico accionista, y ta cai bou responsabilidad di ministerio di Asuntonan Economico. Cu condicionnan faborabel pa establece den e Free Zone di Aruba, metanan di FreeZone Aruba N.V. ta atrae inversionnan internacional, promove y maneha e facilidadnan di Free Zone y promove un Free Zone di clase halto y reconoci mundialmente.

Aprobacion di cuentanan anual di FreeZone Aruba N.V. a tuma lugar den dos fase. Na oktober 2022 despues di 10 aña, minister Geoffrey Weaver a aproba e jaarrekeningen di añanan 2012 - 2019. Cu aprobacion di e cuentanan anual den dos fase, fase 1 jaarrekening 2012 - 2019 den 2022 y fase 2 jaarrekening 2020 - 2023 den 2024 FreeZone Aruba N.V. como compania estatal awor ta up to date.

"Como compania estatal bo mester tin bo jaarrekeningen up-to-date y entrega na tempo. Mi ta contento cu awo jaarrekeningen di FreeZone Aruba N.V. ta up to date. Mi ta kere den potencial di FreeZone Aruba N.V. como un actor importante den desaroyo di un economia diversifica y moderno na Aruba.", segun Minister Geoffrey Weaver.

Minister Geoffrey Wever: **CURSO DI FINANSA DEN MI HOGAR NA SANTA CRUZ**



E curso Finansa Den Mi Hogar a continua na Santa Cruz despues di a wordo ofreci den Village San Nicolas, Madiki Kavel y Jaburibari. "Meta di e curso Finansa Den Mi Hogar ta pa nos hendenan ricibi guia y conocimiento cu por yuda nan tuma decisionan financiero cu ta beneficia su propio desaroyo personal y familiar", segun minister Geoffrey Wever.

Finansa Den Mi Hogar ta un programa di educacion financiero desaroya pa Fundacion Plan di Bida. Fundacion Plan di Bida cu su presidente sra. Paloma Tromp tin como mision trece conscientisacion financiero den nos comunidad, ofreciendo guia con pa maneha nos finansa mas efectivo. Despues di e prome edicion exitoso, a dicidi cu e di dos edicion di e curso Finansa Den Mi Hogar lo wordo duna dentro di e districtonan mes e biaha aki - mas cerca y accesibel pa e ciudadonan - y un bes mas, cu participacion completamente gratis.

Na Aruba 3 di 10 hogar ta gasta mas di nan entrada tur luna segun sondeo di Banco Central di Aruba. E desaroyo aki ta

uno preocupante pasobra e ta indica cu cada luna ta un reto pa hogarnan cumpli cu tur necesidad y responsabilidnan financiero manera entre gasto pa vivienda, cuminda, y prestamonan personal. Como consumidor ta importante pa sa ki impacto cada decision financiero tin riba nos cartera y nos hogar.

"Ta nos compromiso pa sigui ofrece e curso gratis y haci posibel cu tur ciudadano por yega facilmente y participa activamente na curso Finansa Den Mi Hogar", segun e mandatario. "P'esei e segundo edicion di Finansa den Mi Hogar ta wordo ofreci den bario, mas cerca di cas unda hunto cu bisiñanan personanan por participa", segun minister Geoffrey Wever.

Pa mas informacion y registracion pa e segundo edicion di Finansa den Mi Hogar por tuma contacto cu Fundacion Plan di Bida via telefon 5688848 of email: finansasdenmihogar@gmail.com



E GRADUADONAN DI COLEGIO NIGEL MATTHEW A RICIBI NAN DIPLOMA DI HAVO



Diasabra ultimo, Minister di Enseñansa y Deporte Endy Croes a acudi na Ceremonia di Graduacion di Colegio Nigel Matthew den e prestigioso ballroom di Marriott Resort. Durante e ocasion special aki, 85 estudiante a gradua y cu emocion a ricibi nan diploma di Havo. A inicia e anochi cu Himno Nacional di Aruba. Ademas di esaki, a anuncia e miho graduado di 7 vak, kende ta Elangely Valecillos-Andrade y miho graduado di 8 vak, kende ta Kevin Li.

Cu hopi emocion e mayornan presente tabata aplaudi y mira nan yiu ricibi nan diploma di Havo cu hopi orguyo. Despues di hopi sacrificio, esfuerzo y perseverancia, e alumnonan a logra e milestone aki. A culmina e aña escolar cu broche di oro pa e graduadonan, bailando hunto cu nan mayor- y docentenan riba e ritmo di e banda musical 'N FUZION. Minister Endy Croes a gradici rector di Sr. Ralph Croes, staf, docente di Colegio Nigel Matthew pa e gran trabou cu nan ta haciendo. Pa finalisa, Minister Endy Croes ta felicita e studentenan cu a traha duro pa logra nan diploma di Havo y ta encurasha nan pa sigui studia.



Minister Endy Croes: AVONDHAVO-VWO A CELEBRA NAN CEREMONIA DI GRADUACION

Diasabra ultimo, Ceremonia di Graduacion di Avondhavo-Vwo a tuma luga den e prestigioso ballroom di Embassy Suites. Minister di Enseñansa y Deporte Endy Croes tabatin e honor di comparti un momento asina special di e graduadonan. E aña aki 48 estudiante a ricibi nan diploma di Havo y 11 estudiante a ricibi nan diploma di Vwo. Minister Endy Croes a hiba palabra, felicitando e graduadonan cu a logro aki. Durante e ceremonia di graduacion, a anuncia e miho graduado di Havo, esta Shannon Rob.

Ademas di esaki, a anuncia e miho graduado di Vwo, esta Juan Gomes cu tin 56 aña di edad. Sr. Juan Gomes ta un polis den funcion, kende 2 aña pasa Minister Endy Croes a entrega su diploma di Havo. Durante su discurso, Minister Endy Croes a para keto riba “Lifelong learning”. “Boso sigui educa boso mes y desaroya boso habilidnan. Enseñansa ta e arma mas poderoso cu tin pa cambia mundo. Gobierno di Aruba ta percura pa tin plataforma suficiente pa tur persona di Aruba tin e acceso na esaki y sigui educa nan mes”, e” mandatario di Enseñansa a expresa. Minister Endy Croes a encurasha tur hende pa haci uzo di e plataforman aki.

Pa finalisa, e mandatario di Enseñansa y Deporte a gradici directora Nathalie Wever, staf y docentenan di Avondhavo-Vwo cu a contribui den e desaroyo di e alumnonan. Alabes, ta gradici e famia cu a duna sosten na e graduadonan pa logra nan meta. Finalmente, a felicita e graduadonan di Avondhavo – Vwo cu a ricibi nan diploma exitosamente. Cu deseo dedicacion y determinacion bo ta logra,



2024

AÑA DI STABILIDAD Y PROSPERIDAD



Gabinete Wever-Croes

Ora nos cana den cayanan di San Nicolas cu ta dorna cu artenan mahestraal aki, nos ta realisa cu bunitesa por wordo haya den luganan menos spera. Arte di muraya ta e language visual cu ta conecta culturanan, na unda cu por aprecia historia, color, fantasia y dedicacion.

